



Bisdóm Willemstad

Julianaplein 5 Curaçao, Dutch Caribbean -Tel (599-9) 462-5876
Fax (599-9) 462-7437 • E-mail: bisdómwstad@gmail.com

Mensahe di Atvènt 2017

Rumannan den Kristu,

Mi ta invitá boso pa kuminsá e temporada di Atvènt ku e palabra di e *salmo 85*:

“Salbashon ya ta serka su fielnan,/ su gloria ta bin biba den nos tera,/ amor i berdat lo topa,/ hustisia i pas lo brasa otro” (Sal 85,9-10).

Na diferente okashon nos ta resa e salmo aki, pero durante e preparashon di Pasku di Nasementu, e ta haña un nifikashon semper nobo: ta ekspresá un deseo ku ta bira realidat den nos bida personal i pa henter humanidat. E liturgia di Atvènt ta krea kada aña un ambiente di speransa. Nos ta bai tende e Bon Notisia aki den e lekturanan di misa di tur dia. *Salbashon ta ya serka*, Hesus ta bini, nos ta sinti su presensia, nos ke bai na su enkuentro!

Un aña di Hubileo

Ku e promé djadumingu di Atvènt nos ta kuminsá un aña litúrgiko nobo ku nos ke selebré komo un Aña di Hubileo di nos Diósesis ku ta kumpli 60 aña di su eksistensia. Nos ke biba e aña aki komo un tempu di grasía ku e lema: *Enkuentro ku Kristu, enkuentro ku otro*. Un enkuentro, manera Evangelio ta bisa, ku semper ta produsí frutanan positivo, di kombershon i kambio di bida. Asina papa Fransisko ta bisa: “un enkuentro ku Hesus ta duna nos alegría i un speransa nobo; e ta kondusí nos, te hasta den momentunan di prueba i difikultatnan na un enkuentro mas profundo... pa desgrasia nos ta kustumbrá na un kultura di indiferensia... pero nos mester traha i pidi e grasía pa realisá un ‘kultura di enkuentro’... ku ta debolbé kada persona su dignidat propio di yu di Dios”.

“Hesus ta indiká nos e manera: no keda mira so, ma wak. No tende só, ma skucha. No pasa bai, ma detené bo mes; no bisa solamente “ki lástima, pover hende” ma bai serka dje, laga kompashon yena bo kurason” (Papa Francisco, *Homilia*, 13-9-2016).

Den e aña aki di Hubileo, laga nos praktiká e ‘kultura di enkuentro’. Pa logra esaki nos mester sali for di nos seguridat, bai serka nos rumannan den nan situashon kokreto.

“Den Evangelio nos ta lesa ku Hesus ta invitá su disipelnan pa sali. No ta trata di un kanamentu inutil di Señor. Miéntras e ta kana, e ta topa, ora e ta topa, e ta aserká; ora el a aserká, e ta papia; ora e ta papia, e ta toka ku su poder i ora e ta toka, e ta sana i ta salba. Sali pa logra un enkuentro, pa keda un ratu; pa inkliná ku kariño na e persona, pa tuma kontakto sin miedu (cf. Francisco, *Bishita apostólíko na Colombia, 7-10 sept. 2017*)).

Laga nos tuma kontakto ku nos rumannan ku ta biba den e “periferianan eksistensial” di diferente situashon sosial. Riba kada un di e seis isla ku ta forma nos Diósesis, nos por individuá realidatnan di soledat, di pobresa material i spiritual, indiferensia, individualismo i hasta diskriminashon. Nos tarea komo disipel i misioneronan di Hesus ta

pa realisá un salida, un enkuentro, un bishita; laga nos animá otro den nos parokia i gruponan pastoral, na un manera spesial den temporada di Kuaresma i Pasku di Resurekshon, den kua nos por introdusí e bunita kustumber di bendishoná kas di famia.

Un año di Hubileo pa promové union entre saserdote, religioso i laikonan

Den nos konferensia di klero, nos a tuma komo meta pastoral pa e año di Hubileo: promové union entre saserdote, religioso i laikonan. Pero pa nos por kosechá e fruta di union, nos mester prepará e tereno i planta e simia di diálogo i di konfiansa, aserká otro, i eliminá murmurashon; lo ta nesario promové aktividatnan ku ta yuda kompartí i selebrá nos fe komo famia, nos amistad komo grupo i komunidat parokial.

Komo prioridat pa promové union, nos ke duna e laikonan e lugá ku nan meresé komo e parti di Iglesia mas numeroso, i pasobra nan tin un mishon importante di koperá pa santifikashon di mundu, pa medio di testimonio di nan bida (mira *Lumen gentium* 31). Papa Fransisko ta bisa nos ku “e speransa na América Latino i Karibe ta pasa a traves di kurason, mente i brasanan di e laikonan!”.

Na un manera partikular, laga nos promové e *Pastoral di Famia* i *Pastoral Hubenil* ku enkuentronan di formashon pa mayornan (=skol di mayornan), invitá nan na e Eukaristia di djadumingu komo famia i organisá bishita na kas di famia di parokia.

E año 2018 lo ta un año dediká na e hóbennan pa motibu di e Sínodo di Obispanan ku e tema: *Hóbennan, fe i desernimentu vokashonal*; lo ta un año di preparashon pa e Hornada Mundial di Hubentut ku lo tuma lugá na Panamá, yanuari 2019.

Komishon di Pastoral Hubenil di Diósesis a inisiá un programa di formashon di nos hóbennan, tumando na kuenta e realidatnan konkreto di famia i hubentut riba kada isla. Pa yega na esaki, mi ta sugerí pa pastor di parokia i katekistanan animá e mucha i hóbennan ku a konfirmá òf ku ta prepará pa risibí e Sakramentu di Konfirmashon, pa nan sigui perseverá i bini huntu na e S. Eukaristia di djadumingu. Mi ta spera ku den kada parokia lo surgi un grupo hubenil ku por kompartí e Palabra di Dios i organisá aktividatnan kultural i deportivo.

Un año di Hubileo pa un kombershon pastoral i un mishon permanente

Un di e puntonan importante pa nos kultivá e semia di union i kosechá su frutanan ta yama “kombershon pastoral”, ku ta un grasia di Spiritu Santu pa renobá nos manera di evangelisá. Papa Fransisko den e Ekshortashon Apostóliko *Evangelii gaudium* ta splika loke kombershon pastoral ta nifiká: “perkurá pa tur nos strukturanan bira mas misionero, pa e trabou pastoral den tur su aspekto i instansianan bira mas habrí di tal manera ku e ta pone tur su agentenan pastoral den un aktitut konstante di salida i ta favoresé asina kontestanan positivo di esnan ku Hesus ta reuní den su nomber” (EG 27).

Mi ke rekordá un meta pastoral ku nos a tuma for di año pasá den nos Plan Pastoral Diosesano ku ta bisa: “Laga e Palabra di Dios animá i motivá tur aktividatnan pastoral i bida di parokia: enkuentronan, predikashi, katisashi, entronisashon di Beibel na skol i den kas di famia”.

Mi ta pidi na un manera partikular na e Direktiva, maestro i alumnonan di nos Skolnan Katólíko pa tene kuenta ku e meta aki pasobra nan ta un parti importante di nos Iglesia hóben.

Mi ta konkluí e mensahe aki pidiendo nos Mama Maria pa kompañá nos durante e aña di Hubileo i pa hiba nos na enkuentro ku su Yu Hesus i ku otro:

“Mama Maria, Inmakulada Konsepshon,
humilde sirbidor di Señor i Mama di Iglesia,
intersedé pa nos obispu, nos saserdote i religiosonan
i pa tur nos fielnan, pa nos keda semper uní na bo Yu Hesus.
Amén.

Boso sirbidó den Hesus i Maria,

+ Luis A. Secco, SDB
Obispo di Willemstad